

Paul di buru remanu ere Corinth vene rofu Ago di ini adina

Paul di buru remanu ere Corinth vene rofu bi Corinth ekalesia vene rofu auta reyo meda girari buru reyo. Mina ekalesia vene bedakai yaku Paul rofu ruda regamadi, idu uka yokoi maka nigika ura rei mona reyo. Mina vata niyori, ini uka ada tora niyo.

Bura renari siko bi mina Corinth ekalesia vemesa auta reyadi ago nidodi reyo. Ekalesia vene fogori nifafana resi ruda regamadi vegu rofu gokai ago gira gira niyo, mina nirorotari reyo; ye ini ago gira gira ninari, ini vegu no feresi moi etagae risi uka yokoi maka niyadi, ye mina rofu ada reyo. Mina resi, ekalesia vene rofu usa usa niyo bi Judea gagani gugura beika de ekalesia vene aedegi fore tau gade maraganedi. Ago di metona korori, Paul yaku ini nifeidena amiye kana raka nina Corinth ekalesia vene bedakai fafau nigira reyo; adina mina vene bi ina kaya bi nifeidena vene rama nigasa Paul ofa nifeidena amiye nitourage reyadi.

Beika sina ideri

Ago di ini adina 1.1—11

Paul ma Corinth ekalesia vene 1.12—7.16

Judea gagani ekalesia vene aedegi fore mana 8.1—9.15

Paul ini nifeidena amiye raka nina vava rofu nigira reyo 10.1—13.10

Metona ago 13.11–13

¹ Sei di ura dada, na Paul bi Iesu Keriso di nifeidena amiye niyaka, ma uni dubuini Timothy ka nasa mini —[◊]

Ya Corinth taoniri Sei di ekalesia vene ma Sei di vene tau noibanu Achaia gaganiri amededi ya tau vakoi rofu bura reida:

² Uni Baba Sei ma Varika amiye Iesu Keriso di buni tora gade ma uka amuta ya maragane.

Paul yaku buni tora gade Sei maro

³ Uni esika esika tauri moi aeededo Sei, ma una iriyeduca redo Baba, ina bi uni Varika amiye Iesu Keriso di Baba ma Sei, ye ini roka moi odoro ribinadi! ⁴ Ma ina yaku uni esika esika tau noibanuri una moi aeededo, mina ye una yaku esika esika moiyadi vene moi aedegifa, Sei yaku uni esika esikari una moi aedeyo kana. ⁵ Adina Keriso di esika esika uni vegu ideri vata baesi rausi redo kana, ye Keriso dudu ini moi aedena moisifa ka uni vegu ideri vata baesi rausi redo.

⁶ Esika esika moigifari, mina bi ya moi aedesi ya moi vegu rigo; ye Sei yaku una moi aedegori, mina bi yi vegu moi aedego, ye uni esika moina ida yokoi maka ka ya kaya esika moigedi kana, amuta dudu are rei gira regedi. ⁷ Uni uka mokena ya vene rofu bi gira iniye, adina una una diba uni esika esika moisifari, ya ka esika esika moidedi, ye Sei yaku una aeededo kana, ya vene ka aedego.

⁸ Usika ourena, Asia gaganiri esika esika moiyafa, mina diba niyagane ura resifa. Ini adina mina toe unafafau aeyo bi tora iniye, ye una yaku

[◊] **1:1:** Acts 18.1

duku rena ka yeiva de reyafa, ma uni uka ka yau niyo, ye una bi gua muyegifa mokeyafa.^{✉ 9} Rama, una umuyegedi di meda baeyo kana amuteyafa. Idu mina bi uni yeiva rofu mokena vari gira de aegifa, idu Sei di yeiva rofu mokena vari gira aegifa, kaere bi muyena vene moi dadi rae redo amiye. ¹⁰ Resi no tora iniye iniye una umuyegika reyo, mina una moi vegu riyo, ma una moi vegu rigo,* ye dudusa una moi vegu ribigo, mina rofu uka mokena aesifa. ¹¹ Ye ya vene ka usa usa dudu una aedebifa, ye makai dudu amiye tau una† dada buni tora gade vo nigedi, Sei yaku ina vene di usa usa nina, dada ini buni tora gade una maro.

Paul di nirorotari reyo mokena moi idana reyo

¹² Adina uniye ni-ika resifa bi yomakai: uni uka di mokena yaku niokudo gokai mina konori uni vegu regamafa bi, Sei yaku vegu rama resi ago rama nido kana regamafa; ye besa besa ya vene rofu rei mona regamafa. Una bi diya mina kono di mokena tora dada de regamafa, idu Sei di buni tora gade dada regamafa. ¹³ Adina ya vene yaku beika bura vesi diba niyadi, mina maka ya rofu ida rorobori bura resifa, ye nai uka mokena bi ya mina diba ni vau regedi, ¹⁴ adina ya bi ruika mamo una diba niyadi. Ye uni Varika amiye Iesu di dego medari una ya ni-ika regifa kana, ya ka una ni-ika regedi.

¹⁵ Ya rofu siko bae negi ura reyaka, ye uru remanu buni tora gade moiyanagani, nai senagi

^{✉ 1:8:} 1 Cor 15.32 ^{*} **1:10:** rigo; bura bedakai rido nufa.

^{† 1:11:} una; bura bedakai ya nufa.

reyaka vegu rofu ada reyadi, mina gua diba ni mona reyaka dada. ¹⁶ Macedonia bae nesi ya vegida vonisi, makai dudu nirorotari reyaka, ma ya vene dada Macedonia gutuna dai ribigidari, ya yaku Judea idari na nifeidegedi. ¹⁷ Nai dibo regida di ura regasa nai mokena moi idana de riyaka. Mina kono vene yaku rededi kana, nirorotari resi “Rama regida” ma “Rama de regida” bi uru yokoi makari makai de nida. ¹⁸ Rama inkiye Sei bi vegu rama redo kana, “Yo” nigida bi regida, idu de regida bi “Yo” de nigida. ¹⁹ Adina Timothy, Silas ma na yaku Sei di mida Iesu Keriso di ago yi fogori nirausi regamafari, bi diya “Rego” ma “De rego,” idu ini ago makai kana toga redo. ²⁰ Adina Sei di nitore reyo ago tau noibanu ina dudu bi “Yo” maka. Mina resi ina dudu Sei di vabara rofu “Rama yo” nisifa. ²¹ Mina bi Sei, kaere Keriso dudu ya venesa, una moi are rei gira resi ini vima unafafau rausi reyo. ²² Ma ini bera bi unafafau aesi ini Vima nitore rena ago bi rama niyaine uni ukari aeyo.

²³ Idu Sei bi nai vegu fafau ninegau reyainedi raka nida—yi no rededi fafau emagida baebu dada, dudusa Corinth rofu di nena de reyaka. ²⁴ Bi rama de yi mokena vari gira aena dudu, mina ya ourefeidegika resifa, idu yasa moimai resifa bi ya ada reyaganedi, ini adina, yi mokena vari gira aenari, bi are rei gira rededi.

2

¹ Adina dudusa dairisi ya moi isaka isaka rena

[◇] **1:16:** Acts 19.21 [◇] **1:19:** Acts 18.5

bi makai de regida mokeyaka. ² Adina na yaku ya moi iriyeduка regida vonisi, kaere yaku na moi ada rego? Mina bi kaere na yaku moi iriyeduка regida amiye maka yaku na moi ada rego. ³ Kamini makai bura reyaka—ye na ya rofu bae negidari, bi na moi ada reyagadu vene esika ga na maraganedi, ini adina nai mokena ya tau noibanufafau bi rama, ye beika yokoi dada nai uka ada regori, ya noibanu ka yi uka ada rego. ⁴ Adina ya rofu ouresi bura regasa bi esika esika moisi ne koru tau dudu isaka niyaka ma nai uka ideri bi iriyeduка no iniye niyo. Mina bi diya ya esika magika, idu ya rofu gokai uka mai vau reyaka, mina ya ya diba nigli.

Moi esika reyo amiye ini vegu moi erufuna

⁵ Kamini yokoi yaku esika na maro vonisi, bi diya na rofu reyo, idu ida yokoi dudu ya tau noibanu rofu reyo. Makai ina rofu ago nigira regida baebu. ⁶ Adina ya amiye tau yaku mina amiye rofu toe aeyadi bi kamini, ⁷ ye ya vene yaku ini vegu no moi erufusi moi aedeyagane, iriyeduка no iniye iniye dudu forovai rego baebu. ⁸ Ye ya niguba reida bi ina rofu dudusa uka mana oteimafo. ⁹ Ini adina, ya ebene regika ya bi ago gira tau noibanu neidegedi vonisi, na mina diba nigika makai bura reyaka. ¹⁰ Amiye yokoi ini vegu no moi erufugediri, na ka ini vegu no moi erufugida. Beika vegu no sena moi erufuyaka, bi beika deda vonisi, mina bi Keriso di nemokori ya dada reyaka, ¹¹ ye Satani yaku una eru resi ebu rego baebu. Adina ini nirorotari reyo mokena bi diba niyafa.

Paul yaku Troas ri uka vorivori reyo

¹² Troas ri Keriso di ago buni nirausi regika neyakari, Varika amiye yaku nai nesi moimai regida ida riyo, ^{✳ 13} idu nai vima bi guta de reyo, adina nai dubuini Titus mironari baku de reyaka dada, ye ina vene rofu yuata maka ni feresi Macedonia urana boyaka.

Keriso dudu ebu renā

¹⁴ Idu Sei rofu buni tora gade maida, kaere bi Keriso dudu, iya renā vene yaku rautu toboma oro imisi okiyadi ma kuo airata niyadi kana, una toga ourefeidesi una dudu ina rofu diba nina bi sisika guta kono tau noibanuri rivai reyo kana.

¹⁵ Ini adina, moi vegu rido vene ma muyei didedi vene di fogori, una Sei rofu bi Keriso di sisika guta. ¹⁶ Ye gobuno yokoi rofu bi muyeyadi ma muyegedi vene di sau kana, ma gobuno yokoi rofu bi vegu amededi ma toga vegu ameibobigedi vene di sisika kana. Amiye yokoi yaku mina kana moimai regi anua rego. ¹⁷ Adina una bi diya amiye tau* kana, kaere gugura sero renā kana, Sei di ago moi no ridedi, idu Sei di vegu rama resifa vene kaere nifeideyo kana, ini nemokori Keriso dudu ago nisifa.

3

Uka ago ruaka di naivo rededi vene

¹ Una bi dudusa uniye uniye rama nifeidenā vene vo nigi kora regifa ba? Bedakai vene rededi kana, mina moimai renā di nimaro bura ya

^{✳ 2:12:} Acts 20.1 ^{*} 2:17: tau; bura bedakai idana nufa.

oteimagifa o ya rofu moigifa ba? ² Ya vene ya kaya bi uni vegu buni di bura kana, uni ukafafau bura reyo, ye amiye noibanu yaku bura vesi diba nigedi. ³ Ya vene yaku ya bi Keriso gutuna bura reyo kana oteimadedi ma una ya moi baeyafa. Bi gefari bura de reyo, idu vegu ameibodo Sei di Vima dudu, diya fore rafori, idu amiye di uka mekori.[☆]

⁴ Una mina kana ago nisifa, adina Sei rofu uni mokena buni aeyafa Keriso dudu. ⁵ Beika yokoi una rofu deyo nikake rena di yeiva bi uni ideri koina, idu uni yeiva bi Sei rofu dedo, ⁶ kaere uka ago ruaka di naivo rededi vene di yeiva una maro, diya bura rena dudu, idu Vima dudu. Ini adina bi bura reyo ago gira yaku muyena moi baedo, idu Vima yaku vegu mado.[☆]

⁷ Kamini ago gira, fore rafofafau bura reyo, bi vabara nufa moi baeyo, mina ye Israel vene yaku Moses di seira vegi anua reyadi, vabara dada. Ye meda tauri sisivo nigamo.[☆] ⁸ Mina resi, Vima di moimai bi gokai besa vabara tau tora nufa! ⁹ Ini adina amiye nifafana redo moimai bi vabara nufa vonisi, mokena rorobo amiye mado di moimai ini vabara bi rivai rena iniye reyaine! ¹⁰ Rama, mina makai, beika bi senagi vabara nufa, gua bi ini vabara noibanu koina niyo mini, mina ebu reyo vabara dada. ¹¹ Adina beika sisivo nido bi vabara nufa baeyori, beika bi toga toga ameibobigo bi besa ini vabara tau tora nufa!

¹² Una bi ori yokoi unasa de iniye iniye, mina uka mokena nufa dada. ¹³ Una bi diya Moses

[☆] 3:3: Ex 24.12; Jer 31.33; Ezek 11.19; 36.26 [☆] 3:6: Jer 31.31

[☆] 3:7: Ex 34.29

kana, kaere bi muko ini seira bou riyo, ye Israel vene bi beika sisivo nigo bi ga veyaganedi.^{☆ 14} Idu ini uka mukuna niyadi. Ini adina senagi bogo mina medari mamo, uka ago kori bura vedediri, mina muko bi gua ka amedo ma moi etagae rina kode, Keriso maka dudu moi etagae rigo dada. ¹⁵ Rama, bogo mina medari mamo, Moses di ago bura vedediri, mina muko yaku ini uka fono redo. ¹⁶ Idu amiye yokoi yaku Varika amiye rofu moi kero resi dairigori, mina muko bi moi etagae rigo.^{☆ 17} Kamini Varika amiye ina bi Vima, ma goina sanari Varika amiye di Vima amedo, mironari amiye bi vegu no rofu moi erufuyo. ¹⁸ Ma una muko seira bou de reyafa vene tau noibanu yaku garasiri kama redo kana, Varika amiye di vabara vesifa ma vima yokoi makari una moi idana riyo, vabara keika gutuna vabara tora rofu. Adina mina vegu bi Varika amiye rofu deyo, kaere ina bi Vima.

4

Vima di gugura buni kono kaka urena ideri

¹ Mina dada, Sei di iriyeduca dudu mina rere-mama moi yafa, ye uni uka bi yau de niyadi. ² Idu beika maena moi evata redo vegu, ma amiye yaku sui dudu deda rededi tau noibanu bi ferei vau reyafa. Ofa ofa nina vegu ma Sei di ago moi idana rina vegu moi kekevata usifa, ye ago rama niogau resi Sei di nemokori, amiye tau noibanu di uka di mokena rofu uniye uniye nimagifa. ³ Idu mina ago buni nirausi resifa bi moi sui riyo

^{☆ 3:13:} Ex 34.33 ^{☆ 3:16:} Ex 34.34

vonisi, bi vimari muyededi vene rofu maka moi sui rido. ⁴ Mina kono di ofa sei yaku mokena vari gira de aeededi vene di mokena moi forovai reyo, ye Keriso, kaere iniye bi Sei kana, ini vabara di ago buni di vabara* vegi anua rededi. ⁵ Adina beika ago nirausi resifa bi diya una dada, idu Iesu Keriso bi Varika amiye mina, ma una uniye Iesu dada, yi moimai rei tavoi resifa vene kana niyafa. ⁶ Adina Sei kaere yomakai niyo, “Vabara yaku mukunari kikiyaine!” ina yaku uni uka ideri vabara moi kikiyo, mina bi Iesu Keriso di seirari, Sei di vabara diba nina di vabara kikigi maro.[◊]

⁷ Idu una bi kono kaka urena kana, yeiva de, ini ideri mina gugura buni nufa, ye isivaga iniye vava bi Sei di ma diya una rofu de. ⁸ Eta berou berou tau noibanuri esika esika moisifa, idu una etei de ridedi; uni mokena moi forovai rededi, idu diya uka mokena nufa de; ⁹ esika esika una madedi, idu Sei yaku una ferei tavoi de redo; una usi moi yarededi, idu una moi no iniye de rededi. ¹⁰ Una yaku Iesu di muyena, mina bi uni roaitari toga uakaigasa moi disifa, ye uni roaitari† Iesu di vegu amena ka oteimaraine. ¹¹ Adina una kaere vegu amesifa bi Iesu dada toga toga una umuyegi rededi, ye makai dudu, Iesu di vegu amena ka uni muyegedi roaitari ogau niyaine. ¹² Ye makai resi, muyena una ideri bi una umuyegika moimai redo, idu vegu amena bi ya ideri ya moi vegu rigika moimai redo.

* **4:4:** Bura bedakai ka inafafau kikiyaine mina nufa. ◊ **4:6:**
Gen 1:3 † **4:10:** Bura bedakai ka Varika amiye nufa.

¹³ Bura renari bi yomakai niyo: “Na ago niyaka, ini adina bi mokena vari gira aeyaka dada.” Mina resi una bi mina mokena vari gira aena di vima yokoi maka nufa dada, ye una ka mokena vari gira aesi ka ago nisifa.[◇] ¹⁴ Adina una una diba Varika amiye Iesu moi dadi rae reyo amiye yaku ka Iesu sa una moi dadi rae resi ini budari una yasa afei baesi moi are rego. ¹⁵ Adina mina tau noibantu bi ya vene yi buni dada, ye buni tora gade yaku besa besa amiye tau rofu urafo regasa bi Sei di vabara rofu buni tora gade mana moi tora riyaine.

¹⁶ Mina dada uni uka yau de nidedi. Kamini gokai uni roaita iniye bi iko nidedi, idu ideri uni vima bi ari yokoi yokoiri moi ruaka ridedi. ¹⁷ Adina mina ituari, mina esika aita moisifa yaku toga toga vegu ameibobina vabara tora iniye ina kana koina, bi mina rofu una dogo redo. ¹⁸ Mina resi beika ne dudu vesifa, mina vei mona de resifa, idu beika ne dudu de vesifa mina toga vei mona resifa. Adina beika vesifa bi meda tumuri amego, idu beika de vesifa bi toga toga ameibobigo.

5

Mokena vari gira aena dudu vegu amesifa

¹ Adina una una diba uni karaga—mina bi uni roaita konori—bi ufeya regori, una bi Sei yaku akuyo yava nufa; bi diya vana dudu riyo ma omari toga toga ameibobigo. ² Ini adina mina karagari, anana nisi uni omari roaita aku

[◇] **4:13:** Ps 116.10

magi ura iniye resifa; ³ ye rama aku magifari, roaita di varuka de kana bi uniye baku de regifa.

⁴ Adina gua mina karagari amegasa anana nisi toe moisifa—roaita koina nigo ura de resifa, idu varuka aku magifa—ye beika bi toga vegu ameibobigo yaku beika muyego moi tovo rigo.

⁵ Sei bi kaere yaku mina rofu una dogo resi ini Vima bi rama niyaine nitore rena kana una maro.

⁶ Mina dada una bi toga toga mokena buni buni nufa. Una una diba kono di roaitari amegasa bi Varika amiye gaimari amesifa kana, ⁷ ini adina mokena vari gira aena dudu vegu amegasa dibo resi nemoko dudu de vesifa. ⁸ Kamini una bi mokena buni buni nufa, ma uni roaita gaima gutuna nisi Varika amiyesa uni rauturi amegi ura resifa, mina bi buni. ⁹ Mina dada, una bi inasa rauturi ba gaima gutunari amegifa vonisi, ini uka moi ada regika ura resifa. ¹⁰ Adina una tau noibanu Keriso di kota rena fata di budari ogau nigifa, ye yokoi yokoi yaku beika roaitari reyo kana ini obini moigo, vegu buni ba vegu no bi. [◊]

Sei rofu uka yokoi maka rina di moimai

¹¹ Mina dada Varika amiye ori resifa, mina una una diba, ye bedakai ini mokena vari gira Sei rofu aegi niguba resifa. Ye una gokai kana bi Sei ina diba, ye nai uka mokena bi ya ka yi uka di mokena dudu, mina diba nigedi. ¹² Una dudusa ya vene rofu uniye de nimasifa, idu unafafau ni-ika regi di ida ya vene masifa, ye diya uka ideri, idu roaita etofarori ni-ika rededi vene rofu

[◊] **5:10:** Rom 14.10

ago nikabai reyaganedi. ¹³ Adina uni mokena forovai reyo vonisi, bi Sei dada; uni mokena buni dudu amegifa vonisi, bi ya vene dada. ¹⁴ Ini adina Keriso di uka mana yaku una ourefeideo, mina sena mokeyafa dada: amiye yokoi yaku amiye tau noibanu dada muyeyo, ye amiye tau noibanu muyeyadi. ¹⁵ Ma amiye tau noibanu rofu muyeyo, ye vegu amededi vene bi gabi dudusa inaikvegu de amegedi, idu ina vene dada muyeyo ma muyena gutuna moi dadi rae reyo amiye rofu vegu ameyagane.

¹⁶ Mina dada gua gutuna bobigori, amiye yokoi ini roaita di vegu maka dada de mokebigifa. Mina mo sena meda yokoiri, roaita di vegu maka dada Keriso mokeyafa, ye gua dudusa makai kana bi de mokesifa. ¹⁷ Mina dada amiye yokoi Keriso sa kake rigo vonisi, bi amiye ruaka Sei yaku riyo. Vegu kori bi tatava niyo; va vefa, amiye bi ruaka niyo! ¹⁸ Sei yaku mina tau noibanu reyo, ina kaere yaku* Keriso dudu, inasa una moi uka yokoi maka nisi mina uka yokoi maka rina di moimai una maro. ¹⁹ Mina bi, Sei yaku Keriso dudu kono vene inasa moi uka yokoi maka nisi ini vegu no de mokesi mina moi uka yokoi maka rina di ago nirausi rena di moimai una magamo.

²⁰ Mina dada, una bi Keriso di ago niokuna vene niyafa, ye Sei yaku una dudu amiye niguba redo kana. Kamini Keriso dada, Sei sa uka yokoi maka nifa ya niguba resifa! ²¹ Keriso, kaere bi vegu no de reyo amiye, bi una dada vegu no rena amiye

* **5:18:** Bura bedakai ka Iesu nufa.

kana niyo, ye ina dudu Sei di mokena rorobo
kana nigifa dada.

6

¹ Una bi vakoi Sei di moimai resifa vene, ye una yaku ya niguba resifa Sei di buni tora gade una maro, bi ga tovo ni tavoi reyaine. ² Adina ina yaku yomakai niyo:[◊]

“Nai meda ramari
yi ago neideyaka
ma moi vegu rina vegu meda okiyori
ya aedeyaka.”

Vefa, nai ura reyaka meda bi gua mini; ma moi vegu rina meda bi gua mini.

³ Una yaku amiye yokoi di ida gana de risifa, ye makai dudu, uni naivo renari no yokoi veitao rego baebu. ⁴ Idu ida tau noibanuri, Sei di naivo resifa vene kana uniye nimarafa: are rei gira rei mona rena dudu, esika moina dudu, toe moina dudu, vorivori rena dudu, ⁵ ubobo rena dudu, dibura yavari aena dudu, siboroka rena dudu, moimai rena dudu, urusari varei mona de dudu, iruku irina de;* [◊] ⁶ vegu no yokoi de dudu, mokena vabara dudu, toro rena dudu, uka buni dudu, Vima kikifa dudu, uka mana rama dudu; ⁷ ago rama dudu, Sei di vava dudu, vana rama ma vana enana di mokena rorobo di iya rena gugura dudu; ⁸ ni akeke rena dudu, ni akeke de rena dudu, nifafana rena dudu, ma roka moi odoro rina dudu. Ofa ofa vegu rededi vene kana una rofu mokededi, idu bi vegu rama maka resifa vene;

[◊] **6:2:** Is 49.8 * **6:5:** iruku irina de; o oyo rena. [◊] **6:5:** Acts 16.23

9 toto kana, idu diba ni mona regamadi; muyena tumusa kana, idu rama vegu amesifa; toe una magamo kana, idu una umuyena de regamadi; **10** iriyeduка resifa kana, idu toga ada resifa; baku baku resifa vene kana, idu amiye tau moi gugura nufa rigamafa; beika yokoi nufa kana, idu una bi beika baika tau noibanu nufa.

11 Ya Corinth ekalesia vene, uni mokena kana ya rofu ago niyafa; uni uka ya vene rofu bi ya mai buaru regamafa. **12** Uni uka mana di amutena ya rofu bi kebi de rigamafa, idu ya vene yaku bi yi uka mana di amutena una rofu bi kebi rigamadi. **13** Kamini mina makai, na gua ya vene rofu mida mida kana ago nida: Yi uka ka mai buaru refa!

Ago gira kono di vegu fafau

14 Mokena vari gira de aeededi vene vakoisa moi kake ga ribifa. Ini adina mokena rorobo vene bi gokai ago gira de neidededi venesa auta regedi? O vabara vene bi gokai mukuna venesa auta regedi? **15** Ye gokai dudu Keriso bi Belial[†] sa mokena moi yokoi maka rigo? O mokena vari gira aedo amiye bi mokena vari gira de aedo amiyesa beika rau rego? **16** Ye gokai dudu Sei nivakena yava ma ofa sei bi mokena moi yokoi maka rigedi? Ini adina una[‡] bi Sei vegu amedo nivakena yava kana, ye Sei yaku yomakai niyo:[◊] “Na yaku ina venesa nai ameida yava risi
inasa diga boga rebigida;
Na ina vene di Sei nigida

[†] **6:15:** Belial: Mina bi Bodaka. [‡] **6:16:** una; buru bedakai ya nufa. [◊] **6:16:** Lev 26.12; Ezek 37.27; 1 Cor 3.16; 6.19

ma ina bi nai vene nigedi.”
 17 Varika amiye ka niyo,[◊]
 “Mina dada ina vene feresi
 ina rofu ya kaya moi gaima rifa.
 Beika baika bi kino avaka moina ga refa,
 ye na yaku ya afei dui regida, vo niyo.
 18 Yeiva iniye Varika amiye yaku niyo,[◊]
 Yi baba nigida
 ma ya bi nai rumana mida ma nai rema mida
 nigedi.”

7

1 Nai uka maida vene, una bi mina nitore reyo
 ago nufa dada, ye roaita ma vima moi kino rededi
 beika baika tau noibanu rofu, uniye moi gaima
 risi amegasa, ori dudu uni vima tau noibanu Sei
 di vegu manadi.

Paul uka ada tora reyo

2 Una afei dui refo! Una yaku amiye yokoi
 rofu vegu no de resi amiye yokoi rofu moi no de
 resi amiye yokoi rofu eru rena dudu ini gugura
 de moiyafa. 3 Mina nida bi diya ya nifafana
 regika; ini adina senagi niyaka ya bi uni uka
 mekori amedo, kamini yasa vakoi muyebigifa o
 vegu amebigifa. 4 Na bi ya dada uka gira tora aesi
 ya rofu matuka tora reida; moi aedeni yaku na
 moi vata baeyo. Ye uni esika esika moinari, uni
 uka bi ada tora gade dudu rausi redo.

5 Adina Macedonia gagani okiyafari, uni roaita
 bi sifere de reyafa. Idu, una bi ida tau gaderi esika
 esika moiyafa; uni roaita etofarori iya rededi ma

[◊] 6:17: Is 52.11 [◊] 6:18: 2 Sam 7.14; 1 Chr 17.13; Is 43.6; Jer 31.9

uni ideri ori yaku tunu regamo.^{✉ 6} Idu Sei, kaere uka yau moidedi vene egira redo, Titus di okina yaku una egira reyo. ⁷ Ma diya ini okina yaku maka, idu ina egira reyadi mina dudu ka, ye una rofu nioteimaro ya bi na vegi ura resi na rofu iriyeduka resi mokei tora reyadi. Kamini makai dada na bi besa uka ada tora reyaka.

⁸ Ye gokai beika bura reyaka, mina dudu ya iriyeduka reyadi, mina rofu iriyeduka de reida. Na siko mina rofu iriyeduka reyaka, ini adina veyaka mina bura dudu ya iriyeduka reyadi, idu meda tumuri maka. ⁹ Kamini gua ada tora reida —diya ya iriyeduka reyadi dada, idu iriyeduka regasa vegu no feresi moi etagae riyadi dada. Adina Sei di mokena kana iriyeduka reyadi, ye mina makai, una dudu beika yokoi ya rofu de boiyo. ¹⁰ Adina Sei di mokena kana, iriyeduka rena yaku vegu no feresi moi etagae rina vegu moi baedo, ma mina yaku iriyeduka rena de dudu, moi vegu rina di ida rofu amiye ourefeidedo, idu kono di mokena kana iriyeduka rena yaku muyena moi baedo. ¹¹ Vefa kumo, ini adina gokai Sei rofu iriyeduka reyadi. Ye vegu rama resi yi vegu bi buni oteimagi ura reyadi. Resi mina sena vegu rofu gubuyo resi Sei ori resi uka dadina dudu, vegu rama resi mokei tora resi obini moigi ura regamadi! Ye vegu tau noibanuri, ya mina rofu oteimaradi ya bi vegu no nufa de.

¹² Ye gokai ya rofu bura reyaka, bi diya mina vegu no reyo amiye o mina vegu no rena dudu esika moiyo amiye dada, idu yi mokei tora rena

[✉] 7:5: 2 Cor 2.13

una rofu, bi Sei di budari ya rofu ogau niyaine.
13 Mina dada una moi aedeyo.

Ma una moi aedeyori, Titus di ada rena dudu, uni uka ka bi besa ada tora iniye reyo, ini adina ya tau vanu yaku ini vima moi sifere reyadi!
14 Adina gokai ina rofu ya vene dada ni-ika rena ago maro, na moi maena de reyadi. Ye uni ago tau ya dada bi rama maka, kamini uni ni-ika rena ago Titus di budari, ka bi moi rama reyo. **15** Ma ini uka mana ya vene rofu bi tora iniye reyo, adina ya tau noibanu yaku ago neideyadi ma mina vegu mokeyo, gokai ya yaku ori resi tururu rena dudu, ina afei dui reyadi. **16** Na bi ada regida, vegu tau noibanufafau, mokena buni ya dada moiyaka bi mina dada!

8

Ekalesia vene rau rena vegu

1 Usika ourena, gua Sei di buni tora gade Macedonia dubu fogori maro, mina ya diba nigedi ura resifa.◊ **2** Ini adina esika esika iniye dudu ebene reyadi ma ina vene yaku ada iniye resi ini gugura fore de iniye amenari, gugura tau gade gade rau regamadi. **3** Adina ini ura dada, beika regedi ma beika de regedi kana ini gugura fore rau regamadi ma mina niokugida. **4** Ma Sei di vene naivo resi aedegika di uka moi ada rena vegu, mina una rofu niguba rei mona regamadi. **5** Ma uka mokena regamafa kana, ina yaku makai de regamadi, idu besa iniye siko Varika amiye rofu magamadi, kamini gabu kero resi Sei di ura dada,

◊ **8:1:** Rom 15.26

una rofu iniye ka magamadi. ⁶ Ye Titus niguba reyafa, ina yaku mina buni tora gade di moimai bi kora resi reyo, ye mina ka ya vene dudu moi koina reyaine. ⁷ Idu ya rofu bi gugura tora gade iniye: mokena vari gira aena, ago nina, diba nina, moimai rei mona rena, ma una* rofu uka mana. Ye ya yaku mina buni tora gade di moimai dudu ka gugura tora gade mai mona regedi.

⁸ Na bi gugura rau rena dada ya rofu ago gira de nida, idu moimai rei mona rededi bedakai vene dudu, yi uka mana bi rama ba ide ya ebene reida. ⁹ Adina uni Varika amiye Iesu Keriso di buni tora gade bi ya ya diba, gokai ina bi tau gade nufa, idu ya vene dada doke doke ma niyo, ye ya bi ini doke doke ida dudu makai, bi tau gade nufa nibiyagane.

¹⁰ Ma mina dada nai mokena ago ya nigida: Ferei baena laganiri, ya vene yaku mina moimai regi kora resi bi regedi ka ura reyadi ma mina ya rofu bi buni. ¹¹ Kamini gua fore moisi rau rena moimai moi koina refo, ye ya bi regedi ura regamadi di uka dadina kana, yi beika nufa dudu moi koina reyagane. ¹² Adina Sei bi ura rego uka dadina bi amedo vonisi, amiye beika nufa kana, makai mago bi buni, ma beika koina kana makai de mago.

¹³ Nai mokena bi diya bedakai vene di toe moi aita risi yi toe moi tora riyaine, idu berou berou bi ida yokoi makari ameyagane, ¹⁴ ye gua mina medari, yi beika tau bi ina vene beika nufa de rofu rau regedi, ye ini beika tau bi ina yaku ka yi

* **8:7:** una; bura bedakai ya nufa.

beika nufa de ya rofu rau regedi. Kamini berou berou bi ida yokoi makari amegedi. ¹⁵ Bura reyo kana, “Kaere tau gade butu reyo bi moi tau de iniye reyo, ma kaere keika butu reyo bi keika iniye moina de reyo.”[◊]

Titus ma ini asiyaka

¹⁶ Idu Sei rofu buni tora gade maida, kaere bi ya vene ya mokeida kana, Titus di ukari ka mina kana mokena aeyo!† ¹⁷ Adina ina yaku beika usa niyafa neidesi ini mokena kana iniye ya rofu baegi ura resi baeyo. ¹⁸ Ma uni dubuini yokoi inasa nifeidesifa, kaere bi ekalesia vene tau fogori, ini roka niogau rededi, ago buni nirausi redo rofu. ¹⁹ Kamini mina maka de, idu ekalesia vene yaku abidi reyadi, uni diga boga mina buni tora gade di naivo resifari, bi unasa auta reyaine. Makai dudu Varika amiye iniye di roka moi odoro risi uni aedegi uka dadina oteimagifa.

²⁰ Ye makai resifa, amiye yokoi mina gugura tau rau resifa dada, una nibesenai rego baebu. ²¹ Adina beika bi rama mina regi ura resifa, Varika amiye di nemokori maka de, idu ka bi amiye di nemokori.[◊]

²² Kamini ina venesa uni dubuini nifeidesifa, kaere ini moimai idana idana renari, ebene resi ini mokena bi uru tau gade buni veitao reyafa. Idu gua ina bi besa mokei mona redo, ini mokena buni buni bi ya rofu dada. ²³ Ye Titus iniye bi nai asini, ma ya vene rofu gogo moimai resifa. Ma uni usika ourena vene bi ekalesia vene di

[◊] **8:15:** Ex 16.18 † **8:16:** aeyo; bura bedakai aedo nufa.

[◊] **8:21:** Prov 3.4

nifeidena vene, kaere bi Keriso di roka moi odoro ridedi. ²⁴ Mina resi, ya kaya moi rama aegi, yi uka maddedi ma yafafau mina amiye rofu, ni-ika resifa ekalesia vene tau noibantu di nemokori, nioteimafa kumo veyagane.

9

Ekalesia vene uni asiyaka aedena

¹ Ini no yokoi de, Sei di vene naivo naivo renafafau ya rofu bura de regida, ² adina na na diba yi uka bi ura redo, ye ya dada Macedonia vene rofu ni-ika reida. Resi niyaka, “Achaia gagani vene* bi sena ferei baena laganiri ini mana gugura fore dogo reyadi.” Ma yi mina moimai regi ura rena yaku amiye tau di uka moi vaiyo. ³ Idu mina usika ourena ya rofu nifeideida bi, yi moimai dada, ni-ika resifa bi ago tavoi ga niyaine; ye na niyaka kana, dogo dogo dudu amegedi. ⁴ Beika gokai Macedonia vene bedakai nasa baesi ya veitao regedi, ya bi dogo de ma maena regifa baebu—ma yi maena bi de nigida—adina mokena buni ya rofu moiylaka!† ⁵ Ye moiylaka bi buni uni usika ourena usa nigida, dobau ya egoru regi digedi, ma beika baika nitore reyadi bi dogo regedi. Mina bi yi uka buni dudu dogo dogo regedi, diya ago gira ya maida dada.

⁶ Ago di ini adina bi yomakai: kaere yoyava keika varigo, bi goe goeri iruku keika moigo.

* **9:2:** Achaia gagani vene: Corinth taoni bi mina gagani ideri, ye ini adina bi mina Corinth ekalesia vene. † **9:4:** dogo...moiyaka; o mina nirorotari rena ago dada dogo de ma maena regifa baebu—ma yi maena bi de nigida.

Ma kaere yoyava tau gade varigo, bi goe goeri iruku tau gade moigo. ⁷ Amiye neinei ini mokena kana maraine, diya ura de kana o amiye di yeiva dudu, adina Sei yaku ada dudu, beika baika mado amiye bi uka mado. ⁸ Ye ina yaku buni tora gade ya rofu moi tora rigo, mina resi toga toga beika baika tau noibanu nufa nigiya, moimai buni dudu, beika baika tau gade ya rofu moi tora rigedi. ⁹ Bura reyo kana:[☆]

“Ina yaku davana de nufa rau resi beika baika
irava vene maro;

ini mokena rorobo toga toga ameibobigo.”

¹⁰ Kamini amiye kaere yo varido amiye rofu yo ma ini iri-iri di beredi mado, bi varigo yo masi moi tau risi yi mokena rorobo di rama moi tora rigo.[†][☆] ¹¹ Gugura tau gade moinari, ya kaya ida tau noibanu dudu gugura tau gade magedi, ye amiye yaku una dudu, buni tora gade Sei rofu magedi. ¹² Adina mina naivo rena di moimai bi diya Sei di vene di fore maka rau regika, idu ka bi buni tora gade gade Sei rofu mana kana tora nido. ¹³ Ye mina naivo rena rofu nimadedi vegu oteimaradiri, ina vene yaku Sei di roka moi odoro rigedi, yi Sei gabireri raga rededi dada; mina bi Keriso di ago buni niogau resi beika baika tau gade ina vene ma amiye idana tau gade rofu rau rei maradi vegu gutuna deyo. ¹⁴ Ma ya uka tora manari, bi ya rofu usa usa nidedi, adina Sei di ebu redo buni tora gade yafafau dada. ¹⁵ Sei rofu buni tora gade maraine, ini beika baika amiye yokoi maro dada, inafafau nidodi regi anua rego!

[☆] **9:9:** Ps 112.9 [†] **9:10:** rigo; bura bedakai riyaine nufa.

[☆] **9:10:** Is 55.10

10

Paul yaku ini naivo rena nigira reyo

¹ Na Paul, ya niegira reida—na kaere bi yi fogori ave nida, idu ya ferei gaima reidari bi ori de dudu ameida, vo nidedi. Keriso di uka ave ma amuta dudu ² ya usa usa nida yasa amegidari, uka bubu bi ga oteimagida, idu amiye bedakai kaere mokededi bi kono di vegu dada amesifa, mina rofu makai kana mokena buni dudu oteimagi nirorotari reida. ³ Adina gua mina konori amesifa, idu mina konori diya mina kono di vegu dada iya de resifa. ⁴ Adina uni ruda resifa gai bi diya mina kono di vegu di, idu Sei di vava dudu bi beika bi yeiva iniye moi no rigedi. ⁵ Una yaku kayamo rena ago ma Sei diba ninafafau moi odoro rina mokena tau gade ukero vau resi mokena neinei Keriso di ago neidena erikisi moi gira resifa. ⁶ Ye ya yaku mina ago neide vau regediri, bi dogo resi kaere ago de neidededi ini kaunava magifa.

⁷ Beika vegu roaita etofarori mina maka vededi. Amiye yokoi bi Keriso di eta rofu amedo di mokena buni moigo vonisi, fere kumo dudusa inaike mokeyaine Keriso di eta rofu amedo kana, ye una ka makai. ⁸ Adina Varika amiye ya moi are regika, diya ukero vau regika, una maro vavafafau niika bi besa regida vonisi, maena de regida. ⁹ Ye nai ura bi ga mokegedi, nai bura dudu ya moi ori regida. ¹⁰ Adina nidedi, “Gagani maike gutuna, ini bura bi yeiva ma toe, idu uni nemokori bi yau niyo ma ini ago di buni moi evata rena bi koina!” ¹¹ Makai kana amiye mokei mona re, una yasa de

ma gokai dudu bura regifa, rama bi yasa amesi regifa.

¹² Adina uniye uni vegu di reremama gokai kana bi, o kaere iniye ini vegu di reremama gokai kana nidedi bi, una yaku makai kana de nisifa; de iniye. Idu iniye iniye ini toe o ini vegu gokai kana nilegediri, bi yora de! ¹³ Ye una yaku beika vava nufa, mina dudu besa ni-ika de regifa, idu Sei yaku beika regi o nigi di yeiva una maro, mina makafafau ni-ika regifa, ya ka bosi baku regika. ¹⁴ Adina uni beika ni-ika resifa bi vava ya fafafau dudu moi maike de resifa, ya atafu okina de kana. Adina una siko ya rofu ka baesi Keriso di ago buni nufa, ya atafu okiyafa. ¹⁵ Ma una yaku beika vava nufa, mina dudu bedakai vene di moimai rofu besa ni-ika de resifa. Idu uni uka mokena bi, yi mokena vari gira aena tora nibigo kana, uni moimai resifa roroa yi fogori ka tora iniye nigo. ¹⁶ Ye makai una yaku yi fufutari gagani gaganiri ago buni nirausi resi amiye yokoi di moimai sena redo roroari ni-ika ga reyainedi.

¹⁷ Idu, “Amiye kaere yaku ni-ika redo bi Varika amiye ina yaku beika reyo, mina dudu ni-ika rebiyaine.”[✳] ¹⁸ Adina bi diya amiye kaere inaikie nimado bi Sei yaku nimago, idu bi kaere amiye Varika amiye nimago mini.

11

Paul ma ofa ofa nifeidena vene

¹ Nai ura bi nai mokena forovai keika vei keto regedi. Kamini na tua refa! ² Sei kana

[✳] **10:17:** Jer 9.24

ya rofu maunu nida, adina na bi yi maruka yokoi maka ya nitore reyaka; vegu no yokoi de rumanasa varena kode rema ofi kana, Keriso magida. ³ Idu na bi ori reida, aruma yaku ini mokena vabara dudu Eve eru reyo kana, yi mokena bi vegu no yokoi de ma uka noibanu dudu, Keriso gabireri raga rena gutuna bouna idari ourefeidego baebu.◊ ⁴ Adina amiye yokoi baesi Iesu bouna, una yaku nirausi de reyafa, mina nirausi rego, o vima bouna sena moiyadi kana moigedi, o ago buni bouna sena moiyadi kana moigedi vonisi, mina tau bi aita dudu evade moidedi!

⁵ Nai mokenari, na bi mina roka tora nufa nifeidená vene tora gabireri de; na bi keika de! ⁶ Idu na bi ariarari ago gokai nina diba de moiyaka vonisi, mokena vabara bi nasa mini. Rama, una bi ida tau gade dudu, beika baika tauri mina ya oteimarafa.

⁷ Ye na kaya moi keika riyaka ya moi odoro rigidari, bi vegu no reyaka ba, Sei di ago buni nirausi resi obini de moiyaka dada? ⁸ Yi naivo regika dubu bedakai ini obini moiyaka; bi ina vene rofu duma reyaka kana. ⁹ Ma gugura beika de yasa amegamakari, mina toe bi yokoi rofu de aegamaka, adina Macedonia gutuna baeyadi usika ourena, ya gugura beika de nufa mina na maradi. Ye ida tau gade dudu toe yafafau aena bi biri rigamaka ma makai rebigida!◊ ¹⁰ Keriso di ago rama na ideri maka kana, amiye yokoi de Achaia gaganiri, nai ni-ika rena nivaigo. ¹¹ Ye

◊ 11:3: Gen 3.1–5, 13 ◊ 11:9: Phil 4.15–18

beika resi makai nida? Uka de ya maida dada?
Sei ina ina diba na bi makai reida!

¹² Ye beika reida bi rebigida, ye mina vene ini moimai renari, ni-ika regedi bi amiye di nemokori una kana niyadi, makai ini mina vegu di ida nugai yova rigo. ¹³ Adina, mina kana vene bi ofa ofa nifeidena vene—ina bi eru rena moimai vene, kaere Keriso di nifeidena vene rama kana, iniye iniye nikake rededi. ¹⁴ Makai dudu bi uka ga dadi, adina bi, Satani yaku ka moi kero resi vabara di naivo naivo vima kana iniye nido! ¹⁵ Mina dada, uka de dadisifa, kamini ini naivo vene ka moi kero resi vegu rorobo di naivo rededi vene kana iniye nidedi. Ye ari koina nigor, mina vene di vegu reyadi kana, ini obini moigedi.

Paul yaku nifeidena amiye kana esika gurauyo

¹⁶ Dudusa nigida, amiye yokoi yaku na bi forovai amiye ga mokeyaine. Idu, ya makai na mokegedi vonisi, bi forovai amiye kana na moifa, ye na ka ni-ika reida kana, bi keika maka rebigida. ¹⁷ Mina ni-ika rena mokena dudu ago nida; Varika amiye de dada, idu forovai amiye kana ago nida. ¹⁸ Amiye tau gade bi amiye di mokena dada, ni-ika rededi dada, na ka makai ni-ika regida. ¹⁹ Adina ya bi ada rena dudu forovai vene di ago nidedi, ya bi mokena vabara tau gade nufa dada! ²⁰ Amiye yokoi moimai rei tavoi rededi vene kana ya rego, o yi beika amedo iri mama rego, o ya rofu beika baika moigo, o ini roka moi odoro rigo, o yi seira famago vonisi, mina tau moigedi. ²¹ Mina nida yaku na moi maena reyo, una yaku mina regika yau iniye niyafa!

Idu amiye yokoi yaku beika dada ni-ika resi nigo—na ka mina forovai dudu, beika nigida fafau ni-ika regida. ²² Ye ina bi Hebrew vene ba? Na ka Hebrew amiye. Ina bi Israel vene ba? Na ka Israel amiye. Ina bi Abraham di tutubena ba? Na ka ini tutubena. ²³ Ina bi Keriso di naivo rededi vene ba?—Mina ago nida bi mokena forovai kana dudu nida—Na moimai reyaka bi ini moimai reyadi odoro. Uru tau gade ka na moi dibura aeyadi, idu ina bi uru tau de maka. Uru tau gade na buburu vai reyadi, idu mina bi uru tau de maka. Uru tau gade na umuyegi reyadi.^{*} ²⁴ Uru 5 Jew vene yaku na buburu vai reyadi; buburu 40 na masi yokoi maka moi tae riyadi;* ²⁵ Uru regode auri dudu na uyadi. Uru yokoi maka fore dudu na umuyegika na uyadi. Uru regode bouti odoro amegamaka ma bouti tomu neyo; davara tora tobori urusa yokoi ma meda yokoi maka ameyaka.^{*} ²⁶ Uru tau gade yava ika oto digamaka. Kamini koru odoro dibo bi ravegeragera; duma duma vene atafu dibo ka ravegeragera; nai venesa dibo ka ravegeragera; tutubena idana vene negau dibo ka ravegeragera; taoni ideri dibo ka ravegeragera; gagani autu sanari dibo ka ravegeragera; davarari dibo ka ravegeragera; ofa ofa dubuiyaka venesa dibo ka ravegeragera.^{*} ²⁷ Na bi esika dudu maduna moi

^{*} **11:23:** Acts 16.23 ^{*} **11:24:** buburu 40 na masi yokoi maka moi tae riyadi: Mina vegu bi ago gira dada; Israel vene yaku amiye yokoi buburu vai regediri, bi buburu araka 40 maka marainedi. Idu gokaisanu baku rei mona de regasa bi besa araka magedi vonisi, bi buni de, ye 39 maka magedi (Deut 25.3 baku re).

^{*} **11:25:** Acts 14.19; 16.22 ^{*} **11:26:** Acts 9.23; 14.15

mina moimai reyaka; urusa tau gade varena de reyaka; rauna resi koru vaiyaka; uru tau gade na bi iruku irina de, ma etofarori amesi itu regamaka. ²⁸ Mina tau rei bona maka de, idu ari neinei di mokena toe yaku na ugamo, dubu tau uka mokena dada. ²⁹ Amiye yau nidori, na ka bi yau di amutena moida. Amiye bi vegu no yaku ideri ourefeidedori, na bi nai ideri vaido.

³⁰ Ye naike ni-ika regida vonisi, na bi beika yaku na moi yau rido oteimago, mina fafau ni-ika regida. ³¹ Sei, uni Varika amiye Iesu Keriso di Baba, kaere ini roka bi toga toga moi odoro ribigedi, ina ina diba na bi ofa de nida. ³² Damascus ri, kini Aretas di gavana amiye yaku na moi gira regika, mina Damascus taoni vei mona regamo. ³³ Idu feta tora yokoi ideri merisi taoni kota di etofaro odoro *winido* kafu gutuna na moi feideyadi ma ini vanari yakusi ori diyaka.

12

Paul di yaduka kana

¹ Na toga ni-ika rebigida. Na bi yaduka kana ma beika gabi vata nigedi, Varika amiye rofu sina ago nigida, idu mina rofu beika yokoi de asanu regida. ² Na na diba Keriso di amiye yokoi, kaere bi lagani 14 ferei baenari, bi oma odoro iniyeri afei boyo. Mina bi roaitari o roaita etofaro makai ogau niyo bi na na toto; Sei maka ina diba. ³ Ma na na diba mina amiye ada rena sanari afei boiyo. Mina bi roaitari o roaita etofarori makai ogau niyo bi na na toto; Sei maka ina diba. ⁴ Ye mina

[◊] **11:32:** Acts 9.23–25

amiye yaku de nigo ago bedakai neideyo; amiye yokoi mina ago ga niyaine. ⁵ Mina amiye dada ni-ika regida, idu na kaya rofu ni-ika de regida, idu nai roaita yau ninafafau maka regida. ⁶ Ye na ni-ika regi ura reyagadu vonisi, forovai dudu de niyaidu, adina ago rama nibigida. Idu makai de regida, ye amiye yokoi beika nafafau vesi neidedo, mina rofu besa mokei tora ga reyaine.

⁷ Kamini mina beika gabi vata nilegedi di sina di buni buni rofu, na kaya nai roka niodoro iniye regida baebu, ye imiye nai roaitari maro; mina bi na esika magi, Satani di naivo vima nifeideyo, ye na kaya nai roka niodoro iniye de regida. ⁸ Uru regode mina bi na rofu nifeideyainedi, bi Varika amiye rofu usa nigamaka. ⁹ Idu na rofu niyo: “Nai buni tora gade ya rofu bi kaini, ini adina nai vava bi roaita di yau ninari moi rorobo rido.” Mina dada, nai roaita di yau ninafafau besa ada tora dudu ni-ika regida, ye Keriso di vava nafafau ameyaine dada. ¹⁰ Kamini Keriso dada, na bi roaita yau nina, nifafana rena, toe moina, esika moina ma uka vorivori nufa ada reida. Adina nai roaita yau nidori, bi yeiva moida.

Paul yaku Corinth ekalesia vene rofu uka mokeyo

¹¹ Na bi* forovai kana reyaka! Idu ya yaku mina ida rofu na moi feideyadi, ini adina ya yaku na vei mama reyagadu. Adina na beika yokoi de kana, idu na bi mina ebu rededi nifeidena vene di egona rofu de ameida. ¹² Nifeidena amiye rama di rebe toro rei mona rena, rebe, mokena

* **12:11:** Bura bedakai ka ni-ika renari nufa.

vegu ma moimai yeiva dudu, sena bi yi fogori regamadi. ¹³ Adina na beika ekalesia vene idana rofu resi bi ya rofu de reyaka; ye mina moimai di toe ya maraka dada, no mokena rorobo deri bi na erufufo!

¹⁴ Gua uru regode niyo mini, ya odi digika dogo reida. Kamini toe de ya magida, adina diya yi fore maina reida de, idu nai ura bi ya. Adina mida mida yaku ini nono baba di mukora aena ga reyagane, idu nono baba yaku ini mida di regedi. ¹⁵ Ye na yaku ada dudu, yi uka vima rofu nai beika baika tau noibantu masi naike mai vau regida. Besa ya uka maida vonisi, ya keika maka na uka magedi ba?

¹⁶ Kamini ya nigedi toe de ya maraka, ye yi ago nidedi dada, ya eru resi ofa dudu vegu no yokoi ya rofu reyaka. ¹⁷ Kaere amiye ya rofu nifeideyaka, mina dudu vegu no ya rofu reyaka ba? ¹⁸ Titus digi niguba resi dubuini yokoisa nifeideyaka. Titus yaku vegu no ya rofu reyo ba? Una bi vima yokoiri kana, ida yokoiri nana reyafa.

¹⁹ Gua yi mokena bi ya dada uni vegu moi buni regika ba? Kamini una bi Sei di nemokori, Keriso di usi dina vene kana ago nisifa, idu beika tau moimai resifa bi, uni uka maida usika ourena ya rofu bi, ya ya moi yeiva regika. ²⁰ Adina ya rofu di negidari, nai ura dada de ya veitao regida ma yi ura dada, ya ka de na veitao regedi, mina bi na ori reida: Ya be bi kayamo, gonema, gubuyo, ruda ma nifafana resi fufuta sina nisi roka niodoro resi rafu nomuri amena de rededi baeko. ²¹ Ma dudusa dairigidari, nai Sei yaku

yi nemokori na moi ave rigo baeko, ye na bi mina amiye tau, kaere sena ini vegu no feresi moi etagae de rigamadi vene, ina rofu isaka nigida baeko. Ini vegu no regamadi bi vegu kino, koa rena vegu ma uka ideri mokena no.

13

Metona ago gira ma yuata sina

¹ Mina bi nai uru regode nigo mini ya rofu odi digida. Bura reyo kana, “Amiye yokoi nitourage regori, bi amiye remanu o regode bi ini ago dabi risi niyainedi.”² ² Na yaku sena vegu no regamadi vene ma bouna vene ago gira maraka.* Gua na ini nemokori amena de, ka ago gira maida, uru remanu odi bae nesi reyaka kana: ye dudusa dairigida vonisi, bi ini kaunava magida, ³ adina Keriso yaku na dudu, mina ago nido mina bi rama di beika baika baku rededi. Ina bi yafafau yau de nido, idu yi fogori bi yeiva iniye. ⁴ Adina yau ninari, moi satauro ikoko reyadi, idu gua Sei di vava dudu amedo. Ini adina ini ideri una ka yau nisifa, idu Sei di vava dudu inasa amegifa ya dada.

⁵ Ya kaya yi uka vei mona refa ya bi mokena vari gira aena nufa ba ide. Ya kaya ebene refa. O Iesu Keriso yi uka mekori amedo, mina ya kaya mokededi ba ide? O rama ya kaya ebene resi no baku reyadi baeko! ⁶ Nai uka mokena bi una yaku uniye ebene resi no baku de reyafa, mina veitao regedi. ⁷ Idu gua, ya yaku vegu no yokoi

² **13:1:** Deut 17.6; 19.15 * **13:2:** maraka; bura bedakai masi bura reyaka nufa.

ga reyaganedi Sei rofu usa usa nisifa.[†] Uni ura bi diya uniye ebene resi no yokoi baku de reyafa oteimagifa, idu ya yaku vegu rama reyaganedi dada, yi mokenari una ka no baku reyafa.⁸ Adina ago ramafafau vegu yokoi anua regifa, idu ago ramafafau maka moimai rebigifa.⁹ Ini adina una yau nisifa ma ya yeiva nidediri, bi ada resifa. Uni usa usa ya rofu nisifa bi ya yaku rorobo iniye niyaganedi.¹⁰ Mina dada, na ya maikeri amegasa mina bura reida, ye ya rofu bae negasa na yaku ya moi are rei gira resi ukero vau de regika, Varika amiye di vava na maro bi ago gira gira dudu, ya moi odoro regika.

¹¹ Usika ourena, metonari ada refo. Rorobo iniye nina baku resi ya kaya ya kaya moi aedes iuka yokoi maka nisi uka amuta dudu vegu amebifo; resi uka mana ma amuta nina di Sei bi yasa amebiyaine.

¹² Ya kaya ya kaya yuata nigasa ekalesia vene di fuka refo.

Sei di vene tau gade ya yuata nifeideyadi.
¹³ Varika amiye Iesu Keriso di buni tora gade ma Sei di uka mana ma Vima kikifa di auta ren a bi ya noibanusa ameyaganedi.

[†] **13:7:** nisifa; bura bedakai nida nufa.

**Sei di Uka Ago Ruaka
Ruth and the New Testament in the Doromu-Koki
Language of Papua New Guinea
Rut na Nupela Testamen long tokples Doromu-Koki
long Niugini**

copyright © 2011-2016 Wycliffe Bible Translators, Inc.

Language: Doromu-Koki

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-03-15

PDF generated using Haiola and XeLaTeX on 11 Nov 2022 from source files dated 9 Oct 2020

21189aa1-9850-5863-b4a2-22b21f2fbe9